

庸庵文編

事實

一故宦薛福成字叔耘號庸菴江蘇常州府無錫縣人由附監生捐同知銜中式同治六年江南鄉試副貢生歷官直隸候補同知直隸州知州候補知府

賞戴花翎光緒七年十一月奉

旨署理宣化府知府八年三月交卸奉

旨以海關道記名

簡放十年正月奉

旨補授浙江甯紹台道閏五月到任十一年 月

賞加布政使銜十四年九月奉

旨補授湖南按察使十五年二月交卸道篆入都

陛見四月

特簡出使英法義比四國大臣

賞加二品頂戴以三品京堂候補十六年正月出洋二月到任歷屆奉

旨補授光祿寺卿太常寺卿大理寺卿都察院左副都御史因在差次均未到任二十年四月交卸內渡五月行抵上海積勞得疾六月十九日歿於上海出使行臺距生於道光十八年三月十八

日年五十有七歲七月奉

上諭照副都御史例

賜卹

恩賜祭葬

一故宦曾祖諱世琛祖諱錦堂府學生父諱湘道
光十一年 恩科舉人二十五年 恩科進士
官至廣西潯州府知府三代並

覃恩誥贈光祿大夫

一故宦天性孝友踐履篤實自幼喜觀儒先性理
之書稍長縱覽經史好爲經世有用之學同治

四年夏故大學士曾公國藩督師剿捻寇北上
張榜郡縣招致賢才故宦遂於寶應舟次上書
萬餘言曾公一見大加獎譽延入幕府辦事自
是從曾公者八年當時幕中多閎俊博雅君子
因得講求經濟文章相與上下其議論而於掌
故時政行軍籌餉中外交涉之要所得尤多光
緒元年四月故宦客遊山東擬上治平六策海
防密議又萬餘言由故山東巡撫丁公寶楨代
奏奉

旨留中旋交軍機大臣發各衙門議奏多見施行是年

以直隸州知州需次直隸今大學士李公鴻章
復邀入幕掌箋奏參要政遇事統籌全局切實
指陳幕府所擬疏稿書牘多關繫時局之文李
公諗知故宦可屬大事遂密疏保奏以海關道
員記名

簡放及故直隸總督張公樹聲署理北洋大臣需才尤
急檄飭辦理洋務嘗爲李公籌議與英人烟臺
立約事宜收回利權裨益匪淺後朝鮮內亂上
書張公請迅調兵輪渡海保護迨日本兵艦繼
至我軍已先入定變志餒氣懾乃尋盟而返當

三
時海內名公鉅卿如前侍郎郭公嵩燾總督丁
公寶楨今總督張公之洞應

詔薦賢皆先後密保蓋其識略冠時規畫宏遠早具於
幕府辦事之日矣

一故宦出守宣化府時清訟獄弭盜賊務農勸學
設施甫半載關外士民已稱爲循良不置及分
巡甯紹台道適值法蘭西與越南構衅屢講不
戢瀕海諸行省防務日亟故宦以光緒十年閏
五月到任受事未及兩月卽聞福建馬江敗仗
之信浙防戒嚴巡撫劉公秉璋檄令綜理營務

於是聯絡諸將購置利器修築礮臺周護長牆
分布水雷釘椿沈船其得計尤在遷置教士以
去間諜屢絕引水以杜嚮導自秋徂冬經營布
置久而加密復以其間豫籌餉需添練洋隊親
至前敵周蒞撫輯甯波故濱海輪船往來海氛
旣急謠傳易起自故宦蒞事忠信相孚遂安堵
市易如故列郡無遷避者迨次年正月法人以
追南洋兵輪直犯鎮海故宦督飭礮臺將士用
太礮猛擊而復以輪船之礮附之奮力抵禦屢
中敵船要害前後兩戰皆捷又以我布置嚴密

無從得間相持四五十日卒不得逞迨和議成
復遲久始退論者謂當時非有鎮南關之捷與
鎮海之戰法人未必卽肯就款至甯波一郡從
前英人之變粵寇之亂鮮有能堅守卻敵而民
不被兵者有之蓋自是役始云方事之殷礮聲
轟然屋瓦震動故宦不動聲色措之裕如軍書
旁午或半夜披衣起赴機應敵不少延緩及事
平

朝廷論功行賞加布政使銜遂條上善後事宜爲未雨
綢繆之計迭次馳赴鎮海相度形勢擇於南岸

小港口之笠山築礮臺一座置新式大礮三尊
有此臺可以外顧游山內防鎮口其餘招寶金
雞山各處皆築臺置礮前敵後路節節設險凡
四年而工竣當其升任以去尙以妥籌保護新
築礮臺爲言其慎重海防如此生平勤政愛民
凡遇地方公事輒虛心咨訪窮究利病而不自
以爲能故人亦樂爲之用防務告戢海疆大定
遂有意於興學造士就署之東偏闢後樂園調
浙東高才生課之月凡一集以殿最其文藝時
或接見以親爲講解復於園中隙地創建崇實

書院構屋數十楹規模宏敞廣購書籍延師主講俾諸生肄業其中其設教之法略分義理考據詞章經濟四科蓋竊取曾文正公之意迄今不過十年人材蔚起科第稱盛凡入備侍從出膺民社者已有其人其上者講求實學留心時務皆卓然可爲世用其次教授後進亦不失爲束修自飭之士蓋皆奉故宦之教者也他如修濬甯波水利嚴辦保甲修復遺愛祠以祀巡道之有功斯土者結紹興教案懲台州盜風皆實心爲民寬嚴相濟而於開通商務便益民生之

事尤所注意於是甯波始有機器紡織之廠其
勤求實政又如此所以浙東人士至今謳思勿
衰聞其殯勞謝世且爲之太息泣下也

一故宦奉使出洋往來英法義比諸國到任數月
卽陳察看交涉事宜及豫籌各國使臣合請覲
見各疏復議添設南洋各島領事保護華民並
請申明新章豁除舊禁以護商民而廣招徠俾
出洋華民皆得攜貲回國奉

旨准行於是遂改新嘉坡領事爲總領事兼轄英屬海
門屬部等處並設檳榔嶼副領事又

敕下沿海各省督撫分途出示切實曉諭由是閩粵人之旅居外洋者始有懷歸之樂而免擾累之苦光緒十七年夏長江上下游教案疊出蕪湖丹陽無錫江陰南昌等處教堂多被焚燬旣已查拏匪犯允給賠款而英法各國駐京使臣尙忿爭不已經總理衙門轉行辦理故宦屢往外部推誠相告漸就範圍適有英人梅生代哥老會匪購置軍火爲海關查獲故宦面詰英廷謂須從重治罪以懲效尤英人始覺氣阻乃陳分別教案治本治標之計及嚴禁私購外洋軍火以

杜隱患疏並請調集兵輪分布各口以備非常
由是遷延數月教案遂漸次議結蓋故宦朝夕
籌思與總署及南北洋大臣函電往來實不爲
無助也光緒十一年英人據緬甸時出使大臣
曾公紀澤迭向英外部詰問議久不決惟允由
英駐緬大員按期遣使賫獻方物且願稍讓中
國展拓邊界與外部互書節略旋即交卸遂停
不議故宦查閱舊卷上疏請豫爲籌備不使英
人獨占先著以免臨時棘手經總理衙門請

旨特派專辦滇緬劃界通商事宜於是屢往外部伸理

前約外部堅拒不應停議兩次經故宦反覆駁
斥持之益堅爭之益力辦論逾兩年始允讓地
并代緬甸進呈方物守十年一貢之例維時適
今北洋大臣王公文韶爲雲貴總督故宦每與
之再三商議由海道通行文報以取便捷並承
王公派員迭次查勘隨時知會因得熟知邊徼
形勢而總署諸公又信之有素每有所請無不
照行故宦每言此次立約實賴總署持之於內
王公助之於外合力和衷得以集事往往形之
奏疏書牘中其公忠退讓如此是役也西南則

拓野人山內昔馬等地暨收回鐵壁天馬等關
南面則拓宛頂邊外之地潞江以東科干之地
暨收回車里孟連兩土司全權凡訂約二十條
於二十年正月與英外部大臣勞憇伯力草約
畫諾每當交涉要務事機緊迫輒親至外部斷
斷與爭洋人堅韌亦頗奪氣臨行告辭英外部
招請筵讌敬意有加極稱使者辦事甚爲佩服
此外如會立坎巨提頭目及查探帕米爾情形
皆關係藩屬邊防有裨大局又以強鄰環伺世
變方殷苟不因時通變卽無以建威而銷萌上

疏具陳勵人才整武備濬利源重使職之策其
憂國奉公謀深慮遠時時見於詞色故外國亦
敬而畏之謂足與曾襲侯並稱云

一故宦性情渾穆學行純粹其初私淑姚江王氏
之學以收斂身心爲主後師事曾公國藩奉以
終身生平無書不讀而於歷代史事本朝掌故
尤所熟悉他如九州阨塞山川形勢險要之統
紀以及用兵戰陣天文陰陽奇門卜筮之崖略
靡不鉤稽講貫洞然於心故遇事立應略無窒
礙其於中外交涉之事獨能研究數十年得其

要領之所在近世士大夫謂本理學而談洋務者惟故宦一人而已好治古文辭不拘拘於宗派而淵邈精美所造於梅郎中曾文正爲近其所爲奏疏蓋受法於曾公抒誠論事原本忠孝而一以閎雅真摯之文行之凡所陳請多蒙

諭旨允准其平日得力在此上結

主知亦在此自壯至老讀書辦公日有常課每日辰刻出而治事至夜分丑刻始寢其數十年來逐日行事俱有日記勤以率下儉以奉身待人接物無不實事求是其學以主靜爲體以存誠爲用

故雖軍國大事日不暇給而端坐凝然百務就理蓋其識力有過人者當其附輪內渡適值盛夏海道最稱難行炎熱溼蒸颶颶並作迭出奇險觸動舊疾遂發熱不寐抵滬未及二旬遽終於出使行臺臨歿之日猶接見僚屬料量函牘以潔已奉公爲最乃時事方艱賁志長逝天下惜之

一故宦好學不倦著書獨多其已刻者有庸菴文編四卷續編二卷外編四卷籌洋芻議一卷浙東籌防錄四卷出使日記六卷迨其歿後門下

士鄞縣張美翊爲刻出使奏疏二卷增蕭山陳
光淞爲刻海外文編四卷筆記六卷其家又自
刻出使公牘十卷出使續日記十卷其未刻者
有庸盦別集八卷宣化從政錄二卷幕府古文
稿數卷書牘數十卷東西洋地志譯稿數十冊
皆藏於家其在甯波時嘗出貲刻全氏七校水
經註四十卷范氏天一閣見存書目六卷又選
刊浙東課士錄四卷則書院肄業生之作性喜
藏書建傳經樓儲之在外洋時廣購新出泰西
圖籍謂將譯以授世之談時務者惜未就而遽

歿也

一故宦子四人長翼運光緒十四年江南鄉試舉人直隸候補知縣

特旨以知州補用花翎三品銜二品頂戴在任候選道次剛中邑庠生候選知縣次瑩中監生花翎候選道次敏中剛中敏中已前卒孫三人

余旣敘吾友叔耘薛君浙東籌防錄越四月其庸庵文編亦踵成叔耘歉不自足復以書抵余東瀛郵致樣本屬爲勘定庶昌受而讀之卒業三反乃引其端曰古之君子無所謂文辭之學所習者經世要務而已後儒一切廢棄不講顓并此心與力於文辭取涂已陋而其所習又非古人立言之謂舉天下大事茫昧乎莫贊其一辭道光末年風氣蘊然頽放極矣湘鄉曾文正公始起而正之以躬行爲天下先以講求有用之學爲僚友勸士從而與之游稍稍得聞往聖昔賢修己治人平天下之大旨而其幕府辟召皆極一時英雋朝夕論思久之

窺見本末推闡智慮各自發摠風氣至爲一變故其成
就上者經綸大業翊贊中興次則謨謀帷幄下亦不失
爲圭璧自飭謹身寡過之士叔耘之從公游在同治四
年北征剿捻時視余略後而相從獨久先後入幕府者
八年文正旣沒復參今傳相合肥李公幕府又踰十年
天下不第以高叔耘而益歎頌曾李兩相國之賢事同
一家士之居其幕如客得歸自適其適爲前古所未有
也叔耘旣佐治久聞見出於人人紀述論著亦且獨多
不屑爲無本之學是編所載如策治平者六籌海防者
十敘練兵者一論治河者一議鐵路者一議援越南者

四論傳教者一論援朝鮮者一論海防總司者一書僧忠親王曾文正胡文忠程忠烈遺事者十雖其言或用或否其所述或親見或傳聞而中括機宜皆所謂經世要務當代掌故得失之林也尤拳拳於曾文正公之德之業反覆稱述樂道不厭蓋自公沒已十七年鄉之同事諸賢存世無幾流風餘韻漸就湮沒幾無復有能言者得是編而軼事遺聞網羅無闕其義比於陳壽之定諸葛氏故事此尤今日蹙然足音庶昌所爲心契叔耘愈久而彌敬者也叔耘辭筆醇雅有法度不規規於桐城論文而氣息與子固穎濱爲近讀是編者當自得之

姑不備論云光緒十四年七月遵義黎庶昌敘於日本
東京使署

凡例

一是編分類纂次首奏疏次論議次書次贈序次序跋次傳狀次書事次碑誌次記次銘贊其得四卷各類仍按年月先後爲序而以代作者附後

一近來諸家刻集有代作者或不入集或注代字於題下竟不知所代爲何人古人於代作之文皆入集如昌黎有代張籍與李浙東書東坡有代張方平諫用兵書皆於題中標出所代之人茲編謹仿其例

一是編各文所用體例與大雲山房文彙通例大旨不甚相歧間有因時變通者亦必參酌於子史與諸名

家之集未敢率爾妄作

一大雲山房文例謂地名官名必據今時書之其或沿古稱者存當時語也蓋地則如湖北曰鄂安徽曰皖之類官則如藩司曰方伯臬司曰廉訪之類習俗旣沿舊名偶或借用無妨也惟巡撫不得稱中丞謝山全氏已辨之故謝山集中多有稱撫軍者然細繹左傳撫軍之義係指太子巡撫稱此亦是假借世俗以巡撫兼副都御史銜故稱爲中丞蓋以都御史當古之御史大夫副都御史當古之御史中丞也雖詳稽古制稍有異同然大旨尙不相遠以沿習旣久非此

則文意不顯。故有時亦借用之。又如金元於各路設行中書省。明初改爲布政使司。而俗語相仍。不廢行省之名。亭林顧氏嘗謂近代文家所指之地。不曰某司。而曰某省。於義爲不覈。固已然。亦以沿習既久。稱某省。則人人多解。稱某司。則意義轉晦。且其上尙有督撫。而僅曰某司。亦恐易滋牽混。故不能不仍行省之稱。亦從宜從俗之意也。

一古文用字原宜避俗。然尤貴存當代典制。俾覽者得所攷證。今讀史記漢書地名官名。或頗驚其古雅。不知在當時亦祇沿俗稱也。閱一二千年之久。時異勢

殊始漸覺其古雅耳。故行文雖不妨稍沿舊稱。若過存避俗就古之意。轉使當代典制湮沒不彰。於義無取焉。卽如紅頂花翎等字。文中雖不多用。而有時不能不用者。亦於古文體例無損。

一凡籍隸滿洲蒙古漢軍者。皆以名著而不以姓著。卽其居官行文發檄。但標其名之首一字以代姓。世人耳目亦習之已久。今如必攷其姓。如赫舍哩瓜爾佳等氏書曰

某公某公。無論一時未能盡攷。轉使後世茫然不辨爲何人。此拘於文例而不知例固可以義起也。編中於塔齊布公多隆阿公。每篇初見之處。則書曰塔齊

布忠武公多隆阿忠勇公以下續見則不妨省文曰
塔公多公如此則參酌得中亦以誌當時風俗最爲
明覈殆猶唐代以字行者史但書其姓字不必盡書
其名也

一三代以前蠻夷戎狄大抵在今十八省內卽最遠亦
多相毘連至如漢之匈奴唐之突厥不聞史家稱之
曰匈奴突夷者蓋以其地絕不相蒙也近今西洋人
紛來互市如英吉利法蘭西俄羅斯諸國與古之所
謂蠻夷戎狄者其地皆相去數萬里而文人執筆往
往稱英吉利曰英夷法蘭西曰法夷此不學之過也

編中於諸國直書之曰英吉利曰法蘭西曰俄羅斯。猶曰匈奴曰突厥曰回紇也。或舉其一字曰英曰法曰俄者省文也。因彼諸國施於公牘著於條約者亦常以此爲稱也。

一凡文格稍近或意義稍次者均入外編亦有文稍宜後出者則入續編。

一奏議自應詔陳言一疏外惟在合肥伯相幕中代擬疏稿其關繫大局者尙不下數十篇然究係代作將來伯相必有專書且與外洋交涉之端有稍宜後出者茲謹選錄一二以著梗概。

一文中。有應三擡雙擡單擡字樣。謹依 皇清文頤。

及諸家刻集體例。概作平擡。以歸簡易。題目及評語。尤限於地位。如有當擡之字。則空格以誌之。

一曾文正公嘗稱科場有句股點句之例。蓋猶古者章句之遺意。而又以大圈密點狼籍行間。爲不足法。竊思古之作者。每一文出。未嘗不審於點定。今是編不加圈點。而稍仿點定之義。故句皆有點云。

一文後有評語。暨自識之語。或敘作文之由。或書後來事實。頗足與文中意義相發明。茲悉照錄。以備查攷。卽評文之語較深切者。亦仿古文辭類纂例錄之。無

者不復加評

庸庵文編目錄

卷一

應

詔陳言疏 乙亥

代李伯相擬陳督臣忠勳事實疏 壬申

代李伯相覆陳疊奉寄諭分別籌議疏 己卯

代李伯相籌議海防事宜疏 庚辰

卷二

中興敘略上 戊辰

中興敘略下 戊辰

練兵 己巳

治河 癸酉

創開中國鐵路議 戊寅

與法蘭西立約通商保護越南議 壬午

援越南議上 癸未

援越南議中 癸未

援越南議下 癸未

上李伯相諭西人傳教書 己巳

上李伯相諭赫德不宜總司海防書 己卯

上張尚書論援護朝鮮機宜書 壬午

答張副都御史書 癸未

上閩尙書書

癸未

代李伯相答彭孝廉書

丙子

贈陳主事序

壬申

送王協亭西征序

壬申

卷三

李氏藏書目錄序

己巳

曾文正公奏疏序

癸酉

五省溝洫圖說序

甲戌

季弟遺集序

壬午

籌洋芻議序

乙酉

浙東籌防錄序 丁亥

代李伯相重鋏籌濟編序 己卯

跋曾文正公手書冊子 丙子

顧貞女傳 乙亥

奉天府治中蔣君家傳 丙子

處士崔君家傳 丙子

先妣事略 丁丑

刑部湖廣司主事張君家傳 己卯

贈資政大夫前兵部侍郎廣西巡撫壯節鄒公行

狀 己卯

卷四

科爾沁忠親王死事略

丙子

敘益陽胡文忠公御將

戊寅

書過善人事

己卯

書遊擊過君殉難事

己卯

書桐城程忠烈公遺事

辛巳

敘曾文正公幕府賓僚

甲申

書益陽胡文忠公與遼陽官文恭公交驩事

乙酉

薊州景忠祠碑

辛巳

贈朝議大夫知府銜揀發湖北知縣于謚武愍王

公衣冠墓表 甲戌

代李伯相布政使銜直隸按察使 贈太常寺卿

丁公墓表 辛巳

誥授奉直大夫戶部雲南司主事王君墓誌銘 庚辰

辰

代李伯相兵部侍郎河南巡撫錢公墓誌銘 乙亥

代李伯相刑部直隸司郎中余君墓誌銘 戊寅

重建蘇州南禪寺鐘樓記 甲戌


雜記 四首 己卯

後樂園記 丁亥

峴臺銘 并序 丁亥

長白瓜爾佳氏死事三公贊 并序 戊寅

庸庵文編卷一



無錫薛福成叔耘

應

詔陳言疏

乙亥

奏爲應

詔陳言仰贊

高深事竊臣伏讀邸鈔欽奉

慈安端裕康慶皇太后

慈禧端佑康頤皇太后懿旨諭令內外大小臣工竭誠
抒悃共濟時艱仰見

聖朝博采讜言之至意海內臣民同深欽仰恭惟

皇太后

皇上勤求治理

綸音初布卽停三海工程斥去宮中紛華浮麗之品申明

列聖家法所有不安本分之太監分別斥革定罪用御史李宏謨之

奏將內務府大臣立予革職九卿科道陳言者莫不立蒙

褒答凡所謂節用愛人之政親賢遠佞之謨皆已實見諸施行四海嚮風翕然稱頌孰能復有遺議然臣所欲

進其愚惛者則慎終如始日新又新之說也伊古聖人
造詣愈高則克治愈密蓋節儉之至而仍慮及耗費清
明之至而仍慮及壅蔽憂勤之至而仍慮及因循惟謹
之於微防之於漸而後

聖德無纖毫之累治本旣懋上理可臻若夫用人行政
諸事宜莫外乎遵循

成憲然必有修明之術有補救之方有變通之道臣竊
就管見所及謹擬治平六策曰養賢才肅吏治恤民隱
籌漕運練軍實裕財用均期有裨實務稍濟時艱如蒙
聖明俯賜察覈天下幸甚

世運之所以爲隆替者何在乎在賢才之消長而已夫天之生才恆足以周天下之用然而賢才有盛有不盛者則培養之道爲之也曩者

大行皇帝御極之初

皇太后殷殷求治博訪賢才大臣薦舉每多不次擢用於是碩輔盈

朝勳臣輩出四方瓌俊奮袂崛起以贊

中興之運是豈無術以致之哉蓋由

虛懷宏獎振古罕有而又不拘一格隨宜器使用能光

顯

丕業至今猶被其麻。邇年以來，獎進之賢才似稍不如前矣。竊恐數十年後，老成凋謝，繼起無人。此事之大可慮者也。夫欲賢才之奮興，必先培養於平日。培養之術，其要有三：一曰重京秩。自古設官，重內輕外。漢汲黯出守淮陽，則至於流涕。唐班景倩入爲大理，則喜若登仙。此古帝王居中馭外，鼓舞豪俊之微權也。我

朝頒祿，因明舊制。京員俸薄，不逮漢唐十分之一。又自耗羨歸公之後，外官有養廉，而京員無養廉。人情益重外輕內。然其初升轉，猶易。京外兩途，互爲出入，故供職者不以爲苦。近日京員盼慕外放，極不易得，恆以困於

資斧告假而去。絕跡京華。其留者衣食不贍。竭蹶經營。每於

國家之掌故。民生之利病。不暇講求。此京秩所以愈輕也。查乾隆二年。增京官恩俸。法良意美。度越元明。似宜略仿

前謨。酌爲推廣。別籌恆款。普加京員養廉。籌款之法。宜取諸節省之餉項。方今滇黔關隴。次第肅清。勇營大半凱撤。將來所節餉需。合計不下一千餘萬。應查明各省停撥之餉。酌提十分之一二。飭令每歲解部。以備京員養廉之用。所費於

國計者甚微。所裨於治體者實大。至若清要之選。當謀以經世之具。勿專尙小楷之精。試律之巧。俾獲講求實用。其各部院保舉人員在。

聖明鑒衡不爽。隨宜超擢以勵其氣。中外迭用以練其才。庶舉世重外輕內之見。可以默轉於無形。百年樹人之計。在此舉矣。一曰設幕職。伏查雍正元年。

世宗憲皇帝命督撫保舉幕賓以彰激勸。

諭旨有云。今之幕客。卽古之參謀記室。凡節度觀察等使赴任之時。皆徵辟幕僚。功績果著。卽拜表薦引。彼愛惜功名。自不敢任意苟且。臣謹案我。

朝名臣若方觀承嚴如煜林則徐近年如大學士李鴻章左宗棠始皆託跡幕僚洞悉中外利病故能卓著忠勲可否略仿漢唐宋遺法仰承

世宗鼓勵人材之盛心准令各督撫奏辟幕僚自京外官以至布衣如有才守出羣者許卽專疏保薦視其本職計資論俸一體升轉無職者量加錄用行之稍久必有閎駿之士出乎其間此亦造就之一法也一曰開特科隋唐以降始專尙考試然其時科目甚多登進之途頗廣明初始專以八股取士文風渾樸得人稱盛今行之已五百餘年陳文委積勦說相仍而真意漸汨取士

者束以程式工拙不甚相遠而黜陟益以難憑遂使世之慕速化者置經史實學於不問競取近科闡墨摹擬剽竊以弋科第前歲中式舉人徐景春至不知公羊傳爲何書貽笑海內乃其明鑒然則科舉之法久而漸敝殆不可無以救之矣我

朝康熙乾隆年間兩舉詞科一時名儒碩德及閎雅雋異之才悉萃其中文運之隆遠邁前古非賢才之獨盛於此時也誠以大臣之舉非聞望素著者不敢妄登薦牘其與冥搜於場屋決得失於片時者迥不侔也誠法聖祖

高宗遺意特舉

制科則非常之士聞風興起其設科之名或稱博學鴻詞或稱賢良方正或稱直言極諫應由部臣臨時請旨定奪庶賢才無沈抑之患可輔科舉所不逮而前此空疏之弊亦且漸以轉移或謂方今科甲人員不少而復舉特科恐益致仕途之壅滯不知特科乃曠世而一開所用不過數十人且其所舉大半亦出於科甲是未足爲科甲之累而適所以劑科甲之窮補偏救敝之方不外是矣蓋重京秩則賢才奮於內矣設幕職則賢才練於外矣開特科則舉世賢才無遺逸之虞矣臣之所

願養賢才者此也

自來吏治之升降視乎牧令之賢否牧令之黜陟由乎大吏之考察大吏果賢則吏治不患其不肅也伏讀、皇太后懿旨諭令各直省督撫秉公舉劾任用賢能煌煌

聖訓整飭吏治之宏規不外是矣臣愚以爲方今激勸牧令又有兩端一在清其途一在勵其氣何謂清牧令之途

國朝捐輸之例向因不得已而設我

宣宗

文宗御極之初首停捐例當時以爲美談嗣因髮捻肇
釁餉需浩繁始議推廣捐例然收數未見贏餘仕途益
形龐雜臣嘗考乾隆年間常例每歲捐監捐封捐級等
項收銀約三百萬兩今捐例旣從折減以示招徠而每
歲戶部收銀轉不及百五十萬是何也名器重則虛銜
彌覺其榮雖多費而有所不惜名器濫則實職不難驟
獲雖減數而未必樂輸人情大抵然也自頃軍務告竣
餉需大減如謂

國家闕此百數十萬之經費臣有以知其不然矣況今
甘捐皖捐黔捐等局所得無幾所傷實多該省旣已肅

清尤宜亟行停止。今欲議停捐例，宜於各省鹽課、洋稅、項下均勻指撥，合成鉅款，以抵京銅局之所入。其捐輸常例，但留捐監捐、封捐、級與捐、雜職等項，概收實銀。人知名器之足貴，則戶部收數亦必不至於過絀。

國計無纖毫之損，吏治有澄清之益，轉移之機，非細故矣。何謂勵牧令之氣？東漢縣令往往入爲三公。唐世凡官不歷州縣，不擬臺省。宋制非兩任州縣，不得除監察御史。自明以後，行取知縣皆入爲御史及主事，得人最多。我

朝康熙年間，名臣如郭琇、彭鵬、陸隴其、朱軾，皆由縣令

入爲京員理學經濟震耀一時康熙四十四年御史黃秉中疏言知縣考選科道殊覺太驟

廷議停止乾隆初年又以主事人多缺少凡行取知縣改以知州揀選在當日酌更成法原所以協一時之宜然行之百年州縣無望於清華漸乏循良之績京員未膺夫繁劇或少練達之猷吏治與人材不免兩爲減色今欲整飭吏治陶鑄人材莫如復

聖祖初年行取舊制或稍變通其意州縣兩途並予行取凡科甲出身保舉卓異之員知州行取授御史知縣行取授主事庶銜缺亦足相當而上司操此爲激揚收

令羨此爲清貴吏治必有振興之一日。或謂近日京員壅滯而復參用外員恐愈失疏通之意。不知康熙以前京員練習民事上而督撫下而道府莫不起自京員方今

聖朝知人善任若果摩厲京員俾與外員互爲出入正所以疏通京員也。京外兩途無扞格不通之患而後到治可期矣。夫旣清其途復勵其氣然後責大吏以考課雖中材之牧令猶將自奮於功名然尤有宜治其本者則養廉坐支各項減成不可不復也。查各省文職養廉向支錢糧耗羨同治八年部議廉俸復額必須各省錢

糧耗羨徵收足額始可抵放此亦本末兼權之意惟是州縣養廉大者無過千兩蓋與坐支各款均屬辦公不可少之費今皆減成發給其公私之用必至竭蹶欲其不妄取於民不可得也州縣無清廉之操欲其課農桑勤撫字善催科不可得也且錢糧之不足額半由民欠半由官虧與其靳數成之發款而虧無限之公帑似不如全復舊額而嚴覈官虧可以勸官常卽可以裕國計馭吏之本莫先乎是若夫勸懲之具表率之資是在大吏平時之措注非一朝一夕之故也臣之所願肅吏治者此也

天下當有事之時。軍餉之不能不藉資於民力者。勢也。曩以剿辦粵捻各寇。不得已而設局抽釐。酌取商賈之贏餘。略濟餉需之支絀。以視元明之加賦籌餉。相去不啻霄壤。加以我

國家二百餘年深仁厚澤。挾髓淪肌。商民踴躍輸將。源源接濟。故能饋數十萬嗷嗷待食之軍。而滅方張之寇。惟其如是。而民情大可見矣。然民力必休養於平日。始可借資於一時。今海內軍事已平。臣愚以爲

聖朝軫念民瘼。此其時也。軍興以來。釐金之旺。素推東南數省。今試以江蘇一省論之。江蘇久遭兵燹。創痍呻吟。

吟元氣未復向已力籌鉅餉剿平諸寇今則戶部指撥之款各省歲協之餉悉以江蘇爲大宗計其所出地丁居其一漕糧居其一洋稅居其一鹽課居其一釐金又居其一每項各數百萬幅員不廣於他省而財賦倍徙過之民力之竭亦可知矣以臣所見閭閻十室九空而百物昂貴小民奔走拮据艱於生計力田之農終歲勤動尙難自給偶遇水旱卽不免流移道路其顛沛饑羸之況不可殫述也一省如此他省可知伏惟聖慈恫瘝在抱似宜乘此羣寇蕩平之際與民休息漸裁釐金卽以一時經費未充尙難驟撤可否

飭下各省督撫察度情形。或酌減捐數。或歸併釐卡。以爲異日盡裁之漸。至於布帛粟米。爲羣黎衣食所資。尤宜普除釐捐。大慰民望。若再因循不革。恐承平無事。上下視爲定額。必將有不可少之出款。與爲抵銷。一旦復有不虞之事。將籌何款以應之。故裁之所以爲異日緩急計也。若夫釐金之外。又有屬民之政。則莫如四川津貼一項。四川古稱饒沃。

國初定賦。以其荐經寇亂。概從輕額。故其地五倍江蘇。而錢糧不逮五分之一。厥後生殖日繁。物阜民富。仕宦之人。遂視四川爲財藪。其公私雜費。與一切陋規。莫不

按畝加派名曰津貼遷流日久變本加厲取之無藝用之愈奢凡州縣供應上司之差小者千金大者逾萬綜計民力所出逾於正賦之額幾有十倍不止者夫

聖主有輕徭薄賦之仁而小民轉受苛派無窮之累撈厥出來雖非一日而循是不變終爲厲階茲欲剔除宿弊誠宜大加整頓斟酌時宜明定經制

飭下疆臣風勵僚屬敦尙廉隅庶積習可蠲而於

國計民生兩有裨矣臣之所願恤民隱者此也

自元明漕東南之粟以實京師累代講求其法屢變元用海運患多漂溺明用河運患多勞費二者得失維鈞

今則海道便利事捷而費省。運河梗阻法敝而費多。竊嘗綜其利弊論之。蓋河運不如海運。海運不如商運。臣請略陳其說。自前明以屯田養衛軍。以衛丁運漕糧。

國朝改爲旗丁。其始法非不善。暨其弊也。屯戶不能耕。而傭平民以耕。旗丁不能運。而募水手以運。於是積耗多而遊手繁。旗丁誅求於州縣。州縣暴斂於平民。其取盈於旗丁者。則有鬪官。有弁兵。有倉書。其取盈於州縣者。則有上官。有豪紳。有胥吏。上下交征。而州縣之取諸民者。往往三四倍於正賦。其費之出於上者。則有漕艘之修。有旗丁之糧。有州縣之支銷。有糧道之經費。加以

聞官衛官之俸漕標河標之餉溯查嘉慶年間協辦大學士劉權之疏言南漕每石需費十有八金蓋合上下浮費而言之

國家歲漕四百萬石之米是有七千餘萬金之費也近歲海運之法行蓋窮極變通之候在

國家減省浮費裨益實多其州縣之漕章亦經各省大吏酌中釐定明予以辦公之經費隱絕其無限之浮收民情翕然至今稱便乃聞議者頗欲規復河運苟非狃於故見則必有所利於其中者也啟中飽而便私圖孰甚於是是河運之不如海運明矣臣又聞京倉支用以

甲米爲大宗。八旗兵丁不慣米食。往往由牛衆章京領米易錢。折給兵丁。買雜糧充食。每石京錢若干。合銀一兩有奇。相沿既久。習而安之。官俸亦然。領米輒發米舖。或因攪雜泥沙霉爛。不堪復食。則發糖坊。每石得銀一兩有奇。赴倉親領米者。百不得一。蓋涉途遠。則侵蝕必多。經時久。則折耗自易。以漕運無窮之勞費。而每石僅獲一金之用。亦可慨矣。今誠統計南漕抵倉之米。每歲共有若干。

飭令各省將折漕之價。與其應發水腳之費。解交部庫。所有甲米官俸願領銀者。照漕折銀數發給。每歲部發

鉅帑慎選廉幹之員於天津通州京倉三處招商運米
宜於免關稅外援糧船帶免他稅之例定爲運米若干
石准免他稅若干回空之船一體給照免稅倉米旣滿
而運米鬻於市者亦如之商人惟利是鶩一聞定例則
江浙之米與奉天牛莊之米必將航海而來山東河南
之米亦由運河而至京東豐潤玉田之米絡繹駢集惟
所擇之如此則有七便焉米色精潔一便也部庫充裕
二便也民力久紓三便也內外支銷漕項節省至千萬
兩以外四便也甲米官俸所得有豐於前五便也都門
內外米商奔赴百貨流通六便也畿民見米之易售多

種稻田漸興水利七便也有此七便上下交益是海運之不如商運明矣或謂滄海茫茫恐一旦有不測之變招商亦難經久終不如河運之可恃不知護運道以備不虞可也慮滄海之有警因謂海運不如河運此因噎廢食之見也況今洋面平穩輪船迅速雖在多事之秋富商大賈挾數百萬之貲致數萬里之遠踰山涉波艱難險阻曾不假尺寸之勢什伍之衛不患不達而運河數千里節節淺阻一有烽塵之警亦未必暢然可行爲今之計宜以海運與招商並舉如招商著有成效不妨漸推漸廣而略以海運輔之仍隨時保護運河量加修

濬每歲酌行河運十數萬石務使運道毋廢而已若是而謂運道有壅闕之虞京倉有闕乏之患必不然矣臣之所願籌漕運者此也

自古養兵無善政南宋之括財晚明之加賦皆爲兵多所累識者病之我

朝緣營兵額五十餘萬較之宋明業已大減然養兵之費歲二千萬幾耗天下歲入之半軍興二十餘年各省剿賊皆倚勇丁以集事曾未聞緣營出一良將立一奇功臣蓋嘗深究本末而知其弊也查各省緣營舊制馬兵月餉銀二兩步兵一兩五錢守兵一兩平時仰事俯

畜尙難自給咸以小賢營生手藝餬口承平日久或沒齒不經戰陣其居將領之任者亦復狃於因循拘於文法於是乎有老弱濫竽之籍有役使趨走之卒有侵減虛懸之餉其兵仰食縣官視爲當然悍者飲博無賴愿者疲玩不振每遇操演之期巧飾虛藝以炫耳目一聞徵調膽寒氣沮甚者僱人頂替行則需車役則需夫繁索供張官民交病洎乎臨敵真能折衝致果者百無一二積弊相嬗雖有豪傑之士無由奮興然則綠營之不可復恃者時勢然也自楚軍淮軍相繼並起勇丁月餉倍於綠營之戰兵其得力尤在法令簡嚴事權專壹自

統領以至營官什長莫不情意相洽誼若一家而又可
撤可募隨募隨練用其方新之氣故能奮建殊勳然今
之勇營已稍不如前矣若使積年屯駐不見大敵久而
暮氣乘之又久而積習錮之恐復如綠營之不振故中
外之議皆主撤勇而練兵夫練兵誠急務也然使僅守
綠營舊制是兵愈冗而愈弱也臣愚以爲居今日而修
戎備與其以一餉養一兵而十兵無一兵之用何如以
兩餉養一兵而一兵獲數兵之用昔人謂兵貴精不貴
多其成效可觀也臣謹案乾隆四十七年增兵六萬有
奇大學士阿桂上疏力爭以歲餉驟加恐難爲繼厥後

果因帑藏大絀。疊議裁汰。頃者海內用兵。未遑兼顧。綠營兵餉。欠發甚鉅。自是每有戰守之事。一倚勇營。而綠營幾同虛設。近見各省整理綠營。如浙江之減兵加餉。直隸河南之添餉練軍。前大學士曾國藩在兩江總督任內。整頓外海水師。舊兵一萬餘名。裁爲二千餘名。以濟添給薪糧。修造船隻之費。部議韙之。蓋中外大臣。皆已深鑒綠營之敝。而思有以救之。非一日矣。可否推行此法。

飭下各省督撫。裁汰綠營虛額。與其衰廢斥退之缺。病故開除之缺。一概勿補。仍體察各路情形。或存綠營原

額之半或減存三之一以其所節之餉酌加馬步口糧分隸數鎮會合訓練營制太破者歸而併之汛防太散者撤而聚之約計腹省有勁兵一萬邊省萬五千人卽可以彈壓盜賊隱備不虞仍酌留得力勇營參錯屯駐有事則輔以召募藉戰守之實務行訓練之成法如是則平時無冗食之兵臨事獲勁旅之用循名覈實化弱爲強計無過於此矣雖然方今要務整理綠營之外尤有培護根本之計有慎籌門戶之計所謂根本之計何也我

國家神武開基東三省勁騎爲亙古所僅見近以徵調

絡繹漸至凋零。老者物故。弱者未壯。其於布陣合圍之法。馳驅擊刺之術。漸失其傳。若不及時整飭。恐斯事遂爲絕學。似宜

飭下吉林黑龍江將軍。挑選駐防子弟。優加廩餼而勤練之。務使制勝妙技。廣續不窮。將來健旅日出。北可固邊塞之防。西可備新疆之用。所裨豈淺鮮哉。所謂門戶之計何也。東南軍事。以水師爲最利。長江水師。利用舳板長龍快蟹等船。外海水師。利用廣艇紅單拖罾等船。而論今日海疆所需。則輪船尤爲利器。然其操演之法。與長江水師。截然兩途。與外海水師。亦迥然異轍。苟非

專門名家窮年畢世不能洞悉其精微今中國閩滬各廠雖陸續製造輪船似尙乏統帶輪船之將才則利器不可得而用也夫事當締造之初非破格鼓舞不足以彰激勸似應

飭下海疆大吏薦舉輪船將才其尤異者不次拔擢俾天下知功名之路相率研求殫精畢力以備干城之用庶幾將才益練水師益精而外侮無虞矣臣之所願練軍實者此也

孟子有言無政事則財用不足大學平天下一章於理財之道蓋兢兢焉臣之愚策如所謂加養廉停捐例裁

釐金皆有妨於財用者也。如所謂覈冗餉、籌漕運、減兵額，皆有裨於財用者也。以其所贏補其所絀，原足相當。而論方今不涸之源，則尤賴

朝廷崇尚節儉，以風天下。天下盡趨於節儉，而財用無不足之虞。故臣又以爲理財之政，不必開其源也。惟在節其流而已。節流之法，不必廣其術也。惟在覈州縣之交盤而已。謹查吏部定例，州縣交代，正限兩月內不能結者，謂之初參。展限兩月，復不能結者，謂之二參。如舊任官虧缺，正項錢糧，或並無虧缺，而新任官遲延不接者，皆由該督撫題參革職。交代未清，而該上司不聲明

者司道府州降三級調用督撫降一級留任此行之久而無弊者也降及晚近州縣交代不盡依限完結上司憚處分之繁亦遂不依限題參往往藉輾轉駁查宕延歲月及其浸久舊任困於旅費無款可交終身寄寓子孫流離皆所不免其新任以舊款未清轉相牽率於是交代不結者什有八九而上司亦遂有參不勝參之勢庫款之所以日虧職是故也臣聞近來辦理交代以山東爲最善山東一省自前撫臣閻敬銘申明舊例刊刻交代章程十一條頒發州縣並通飭各屬不得藉各項工程名目報銷正款錢糧其交代逾限者參革毋貸同

治初年每歲藩庫所收正雜各款不過八九十萬兩近則藩庫收款至二百五十萬以外藉支本省餉需及京協各餉一省如此天下可知矣夫州縣職司錢糧坐擁倉庫計其公私之用每歲多耗數千金未甚覺其費也然合天下千五百州縣計之是三年而耗二千萬也彼曾任州縣者亦以挪移甚便不能節縮衣食終不免窘乏之虞查抄之累此公私兩損之道也若交代素嚴俾州縣豫知節嗇則

國家少虧帑之虞州縣免終身之累此公私兩便之道也如臣愚見可否

飭下戶部申明舊例。並咨取山東交代章程。通行各省。實力辦理。又恐積虧之後。驟加整頓。則新舊相混。窒礙必多。欲杜侵虧。惟有寬既往而嚴將來之一法。酌復養廉。以裕其力。禁止攤賠。以清其流。庶各省大吏。易於措手。自茲以往。逾限必參。三參必革。功令嚴而虧挪少。虧項絕而庫藏充。理財之道。莫先乎此矣。臣之所願裕財用者此也。

以上六策。皆史冊經見之端。士民欣慕之事。或經列聖創垂而著爲良法。或係大臣籌措而迭見成功。臣不過就聞見之餘。略參引伸之義。冀可推行乎海內。先

期斟酌乎時宜雖

國家大政不止此數端然苟非治術所深資平時所切
究亦不敢掇拾細故冒昧瀆陳臣自惟學識疏庸無以
仰答

高厚生成於萬一謹體

聖世求言之意稍摠千慮一得之愚臣不勝戰慄待罪
之至伏乞

皇太后

皇上聖鑒謹

奏

再密陳者自古邊塞之防所備不過一隅所患不過一國今則西人於數萬里重洋之外飄至中華聯翩而通商者不下數十國其輪船之捷火器之精爲亙古所未有恃其詐力要挾多端違一言而瑕釁迭生牽一髮而全神俱動智勇有時而並困剛柔有時而兩窮彼又設館京師分駐要口廣傳西教引誘愚民此固天地適然之氣運亦開闢以來之變局也臣愚以爲欲禦外侮先圖自強欲圖自強先求自治臣所擬治平六策於中國自治之方旣略陳其要矣茲復謹籌海防密議十條冀於自強之道稍裨萬一伏惟

聖明鑒其愚誠俯賜採擇焉。

一擇交宜審也。昔者樂毅伐齊必先聯趙。諸葛守蜀首
尙和吳。蓋有所備必有所親。其勢然也。洋人之至我中
國。專恃合從連橫。而我以孤立無助。受其箝制。含忍至
今。誠欲於無事之時。多樹外援。則擇交不可不慎也。方
今有約之國。以英法俄美德五國爲最強。五國之中。英
人險譎。法人慄悍。所至之地。便思窺伺。釁隙隱圖。佔踞
此中國之深仇。不可忘也。俄國地廣兵強。爲歐洲諸國
所忌。今且西守伊犁。東割黑龍江以北。據最勝之地。以
扼我後路。是宜羅設大防。以爲藩籬。而尤注意於東三

省嚴爲之備而婉與之和。此中國之強敵不可忽也。美國自爲一洲風氣渾樸與中國最無嫌隙其紐約與蒲公使所立新約則明示以助我中國之意蓋亦恐中國稍弱則歐洲日強還爲彼國之害也。故中國與美國宜推誠相與略棄小嫌。此中國之強援不可失也。德人新破法國日長炎炎幾與俄英鼎峙幸其通商之船尙少則交涉之事亦無多。此亦中國他日之強敵不可恃爲援亦未至驟爲患也。自昔列國爭雄之世得一國則數國必折而受盟失一國則諸國皆從而啟釁蓋擇交之道得則仇敵可爲外援擇交之道不得則鄰援皆爲仇

敵誠宜豫籌布置。隱爲聯絡。一旦有事。則援助必多。以戰則操可勝之權。以和必獲便利之約矣。

一儲才宜豫也。自中外交涉以來。中國士大夫拘於成見。往往高談氣節。鄙棄洋務。而不屑道。一臨事變。如瞽者之無所適從。其號爲熟習洋務者。則又惟通事之流。與市井之雄。聲色貨利之外。不知其他。此異才所以難得也。今欲人才之奮起。必使聰明才傑之士。研求時務。而後可。昔漢武帝詔舉茂才異等。可爲將相。及使絕國者。似宜略仿此意。另設一科。

飭令內外大臣各舉所知。亦不必設有定額。其新科進

士大挑舉人優拔兩貢如有洞達洋務者亦許大臣保薦仿學習河工之例別爲錄用其用之之道如膽識兼優才辯鋒生者宜出使熟諳條約操守廉潔者宜稅務才猷練達風骨峻整者宜海疆州縣求之既早斯用之不窮彼士大夫見聞習熟亦可轉移風氣不務空談功名之路開奇傑之才出矣

一製器宜精也西人器數之學日新月異豈其智巧獨勝中國哉彼國以製器爲要務有能獨創新法者卽令世守其業世食其利由是人爭自奮往往有積數世之精能創一藝而成名者中國則不然凡百工技藝視爲

鄙事聰明之士不肯留意於其間此所以少專家也夫
周官攷工一冊自梓匠輪輿以逮鳧輿函斐陶冶莫不
設爲專官子孫世守勿替他若奇肱氏之飛車公輸般
之攻具諸葛亮之木牛流馬其精詣獨至之處何嘗不
逮西人哉正以後世不崇斯學故浸失其傳耳今欲鼓
舞人心似宜訪中國之巧匠給之虛銜以風勵之隨時
派員帶赴外洋徧遊各廠以窺其奧窔有能於洋人成
法之外自出心裁者優給獎敘或仿西人之法俾獲世
高其利庶巧一日出足與西國爭長矣

一造船宜講也外國輪船之制有商船有兵船商船以

運貨爲主式略短而中寬兵船以戰陣爲主式較長而中狹至其暗輪之高下食水之淺深皆自截然不同方今閩滬所造輪船不盡可作兵船者其初用意蓋欲取兩式而兼營之然其弊也運貨不逮商船之多戰陣不若兵船之勁是欲求兩便而適以兩誤也竊謂自今以後各廠造船宜令訪上等兵船之式專精仿造如有商民願繳造價公置輪船者准其赴局專造商船如此分晰辦理庶中國之船漸推漸精而經費不至浪擲矣一商情宜恤也查西洋立法以兵船之力衛商船卽以商船之稅養兵船所以船數雖多而餉項無缺者職是

故也。往年中國議定章程，設立輪船招商局，奪洋人之
所恃收中國之利權，誠爲長策。惟是推行未廣，華商之
應募領船者，尙屬無幾。且自中外通商以來，江浙閩廣
諸商，亦有置買輪船者，大抵皆附西商之籍，用西國之
旗。雖經費甚大，利歸西人，而諸商曾不以爲悔者，其故
何也？蓋爲華商則報稅過關，每虞稽滯，掣肘必多。爲洋
商則任往各口，無所攔阻，獲利較易也。今誠體恤商情，
曲加調護，務使有利可獲，官吏毋許需索，關津不得稽
留，令明法簡，將來繳價造船之商，自必源源而來，貿易
旣盛，漸可駛往西洋諸埠，隱分洋商之利，然後權其常

稅專養兵船務使巡緝各洋以爲保衛商船之用從此兵船益多而經費不絕富強之道基諸此矣

一茶政宜理也中國出口之貨以絲茶爲大宗茶葉一項與洋人進口之鴉片其價值略足相當然鴉片之來爲害於中國甚深茶葉之往爲利於西洋甚大洋人以茶葉爲性命恃以消瘴毒除疾病不能一日稍離閒嘗詢諸茶商覈諸近日新聞紙綜計每歲各路出口之茶價值約在三千萬兩以外若權其什二之稅是歲入六百萬也今者海關稅則刊在條約不可復改而各省之茶捐茶稅收數未旺隱漏尙多夫欲籌禦外之規必先

操裕財之本。欲勿累吾民而財足。莫若仍取諸外洋。昔管子謹正鹽筴。而諸侯斂袂朝齊。誠知利權所在。足制諸侯之命也。方今中國大利。被洋人網羅盡矣。祇此物產之菁華。可以默操其權。宜於閩浙湖廣江西安徽。出茶諸省。酌加稅額。而嚴覈其隱漏。茶稅暗增。則茶價亦昂。顯取諸內地之民。實隱收洋人之利。惟其經理之法。宜出之以漸。濟之以權。務使洋人相安於不覺。數年之後。必有成效。舉凡製器造船之費。練兵籌餉之源。皆可取資於是矣。

一開礦宜籌也。中國金銀煤鐵等礦。未經開采者。處處

有之貨棄於地而外人垂涎久矣似不妨用彼國開挖之器興中國永遠之利查有礦苗旺處由各省大吏諮訪民情察度地勢果其毫無妨礙始許興辦其開采之法有二一曰官采由官酌撥款項僱洋人買機器隨宜辦理一曰商采仿准鹽招商之法查有殷實華商准其集貲報名領帖設廠置備機器自行采取官爲稽其廠務視所得之多寡酌定收稅章程嚴禁隱漏如是則地不愛寶民無棄財不失中國饒富之權不啟彼族覬覦之漸似亦籌餉之一助也

一水師宜練也外國兵船之式船主爲全船綱領其下

總領官主水陸攻戰有領隊官主船中排隊有大夥
二夥三夥專佐船主行船此外如管理機器看守漁表
與夫裝送子藥視敵取準各有專司其收放帆篷登陟
桅頂駕駛舳板抽水救火等事皆令水手操練職司有
定位作息有定時習之既專且久所以能縱橫無敵今
中國輪船亦頗仿效西法參用洋人究未造其深際無
他學習不如閱歷之精而所用洋人無上選也昔巫臣
教吳武靈胡服始皆借才異國終則遠出其上唐太宗
駕馭蕃將多能得其死力竊謂沿海大吏與出使外洋
之員皆宜留心物色如洋將中有挾高才而願遊中國

者不妨羅致一二人。縻以厚祿。善爲駕馭。先令教練一船。久則推演漸廣。仍仿俄國初年練兵之術。選沿海勤敏之子弟。送入西船。俾習各司。而協貼其經費。數年回國。分配各船。庶技藝日精。水師日勁。不難操券而決矣。一鐵甲船宜購也。西洋守港之恃鐵甲船。猶行軍之恃營壘。尋常輪船。當之輒碎。又有鐵甲小船。所以纏護礮臺。四面伏擊。最爲靈活堅利。惟食水過深。不能遠越重洋。是以至中國者。頗屬寥寥。今中國既有輪船數十號。亦宜酌備鐵甲船。外則巡緝洋面。恃爲遊擊之師。內則扼守要口。勝於礮臺之用。蓋有一鐵甲船。而諸輪船卽

可依護以增氣勢。尤幸彼之不能來犯。我即可恃爲專長。苟非未雨綢繆。則倉猝必難籌措。似未可以需費稍鉅而失此遠圖也。蓋鐵甲小船。不難由內地仿造。其大者工程繁重。驟難得其要領。非在外國定購。不可。又恐定購之後。難越重洋。不妨將鐵料如式剪裁。分拆運送。飭匠釘配。但必議價定造。不可承買舊船耳。

一條約諸書宜頒發州縣也。西人風氣最重條約。至於事關軍國。尤當以萬國公法一書爲憑。如有阻撓公事。違例干請者。地方官不妨據約駁斥。果能堅韌不移。不特遏彼狡謀。彼且從而敬慕之。如或詭隨觊法。不特長

彼驕氣彼且從而非笑之。蓋西洋立國。非信不行。非約不濟。其俗固如此也。方今海疆州縣。商船之絡繹傳教之紛繁。事事與洋人交涉。乃當其任者。往往以未見條約。茫然不知所措。剛柔兩失其宜。其偏於剛者。既以違約而滋事端。其偏於柔者。亦以忘約而失體統。啟釁召侮。職此之由。似宜將萬國公法。通商條約等書。多爲刊印。由各省藩司頒發州縣。將來流布漸廣。庶有志之士。與辦事之官幕書吏。咸得隨時披覽。一臨事變。可以觸類旁通。援引不窮矣。

以上十條。皆係顯著之端倪。亦有可乘之事會。臣謹稽

之古籍準之時宜慮欲周而臆見不敢參謀欲決而先機不容緩用敢附片密陳梗概伏乞

皇太后

皇上聖鑒謹

奏

伯兄撫屏云光緒元年四月平遠丁稚璜宮保在山東巡撫任內代上此疏奉 旨留中旋交軍機大

臣發各衙門議奏其海防密議十條由總理衙門彙入各行省大吏議覆海防各摺核議而治平策六篇則由吏戶禮兵四部分議於是總理衙門議先上以

擇交儲才兩條。關係較重。且與南北洋大臣所論大意相同。始定遣使往駐西洋各國之議。蓋謂此舉爲可聯與國而練人才也。又議準將條約諸書。由總理衙門刊印。頒發各關道各行省。分行州縣。其製器造船。恤商茶政。開礦練水師。購鐵甲船各條。大致頗多許可。並行南北洋大臣酌辦。各部所議之事。除設幕職。復行取籌漕運三條。由吏部戶部議駁。開特科一條。由禮部議請暫緩外。其恤民隱。練軍實。裕財用三端。並下各行省酌辦。自是十年以來。有停止捐例之令。有津貼京員之議。有稽覈州縣交代之新章。而四

川之裁撤夫馬局各省之蠲免米商釐稅及汰減綠營添設練軍吉林黑龍江相繼遣大臣練兵皆以此疏爲之嚆矢當此疏初上時京師頗多傳誦者議論一播鼓動中外建言者往往響應而起昔賈長沙董江都條議漢事或於數十年後見之施行後儒稱其通達治體切於世事吾於此文亦云

朱亮生云此疏洋洋灑灑浩浩落落有千巖萬壑之觀有清廟明堂之概循繹數過始知爲綱者六爲目者幾二十有綱中之綱有綱中之目有目中之目以新聖德爲治平緣起此爲綱中之綱養賢才則

有重京秩設幕職開特科三端肅吏治則有停捐例
復行取加養廉三端此爲目中之目篇中所議停捐
納行海運裁兵加餉皆與鄙見不謀而合其復養廉
恤民隱重京秩核交代皆絕大關係爲治亂盈虛之
所從出言之誠不厭其詳至酌裁釐金爲後日緩急
計識慮更深若京員因謀食不遑未能講求治道及
科目求速化置經史於不問尤能言人之所不敢言
而開特科所以劑科甲之窮復行取無礙於疏通之
路措辭復甚圓湛作者於二十一史因革損益成敗
得失了了胸中而本朝掌故近今利弊尤諳悉無

遺故能折中立言以成至文最可愛者直言無諱中
復能處處婉曲筆筆斡旋讀者但覺其忠愛懇摯不
見其激烈迫切奏疏中有數文字也瓣香從何處得
來知其淵源所漸者遠矣

曾栗誠云海防密議十條筆達而圓意新而確此議
未出之前係是人人意中所無此議既出之後乃覺
人人意中所有方洋務之初起世之人或驚爲異事
或鄙棄而不屑道或挾其緒餘以自重數者皆非也
篇中所引如周官攷工記漢武帝唐太宗管子樂毅
諸葛亮等皆於時事極爲貼切今之所謂洋務者實

多前古已行之事似極奇創卻極平常尤妙在事事
從淺處顯處著筆使人易曉而世易行宜乎乙亥丙
子間斯議傳播一時也

代李伯相擬陳督臣忠勳事實疏

王申

奏爲督臣忠勳卓越始終盡瘁謹陳大略情形請
旨宣付史館以備查覈恭摺仰祈

聖鑒事竊惟大學士兩江督臣曾國藩因病出缺業經
欽奉

恩旨軫念忠良飾終典禮至優極渥伏讀二月十二日
上諭稱其學問純粹器識宏深秉性忠誠持躬清正
天語褒許允爲千古定評至其生平戰功政績昭昭在
人耳目并有歷年奏報可稽無俟臣之贅述惟臣昔佐
曾國藩戎幕數年邇來其事亦爲最久知之稍詳其前

後所歷困苦艱難之境隱微曲折之情與其夙昔志行之所在有外人所不能盡知者請爲

聖主敬陳之伏查咸豐初年粵賊蔓延東南各省分黨北竄羣寇和之流毒幾徧海內承平已久民不知兵綠營將士既未得力各省辦團練者尤鮮成效曾國藩以在籍侍郎奉

文宗顯皇帝特旨出治鄉兵於舉世風靡之餘英謨獨奮不主故常雖無尺寸之權毅然以滅賊自任奏請仿前明戚繼光束伍成法募勇訓練旋駐衡州創建舟師凡槍礮刀鎗之模式帆檣槳櫓之位置無不躬自演試

殫竭思力不憚再三更製以極其精初次出師援岳州援長沙皆不利世俗不察交口譏議甚者加意侵侮當是時勢力既不行於州縣號令更難信於紳民蓋不特籌餉籌防事事掣肘已也曾國藩忍辱負詬堅定不搖庀材訓士奮兵復出湘潭岳州連戰大捷盡驅粵賊出湖南境遂克武漢蕪黃肅清湖北咸豐四年秋冬之間長驅千里席卷無前湘勇之旌旗遂爲海內生色厥後各路之殺賊立功者咸倚爲重以一縣之人而征伐徧於十行省以捍衛鄉閭之舉而終以底定四方前古未嘗有也湖北旣清遂率水陸諸軍循江東下駸駸乎

有直擣金陵之勢。無如事機不順。進圍九江。不克。而督臣楊需之師。潰於上游。賊復竄踞武漢。曾國藩以孤軍困於江西。其部下得力良將。皆遣回援湖北。金陵巨寇勾結楚粵諸賊。乘間飄至。曾國藩兵分餉絀。又無地方之任。事權掣肘。一如在湖南時。崎嶇數年。僅支危局。然其所規畫設施。非僅爲屏障一方之計。丰采隱然動天下矣。咸豐七年。丁父憂回籍。三疏懇請終制。

文宗顯皇帝鑒其孝思。肫切准令。暫守禮廬。旣復奉命視師。廓清江西。進圍安慶。旋以蘇常淪陷。

授鉞東征。畀以兩江重任。當此之時。賊勢如飄風疾雨。

蹂躪大江南北。幾無完土。蘇皖兩省。糜爛尤甚。曾國藩於無可籌措之時。多方布置。奏薦左宗棠襄辦軍務。募勇湖南。徵鮑超於皖北。調蔣益澧於廣西。定計不撤安慶之圍。自率所部萬人。馳入祁門。甫接皖防。而徽甯復陷。諸路悍賊。麇集祁門左右。疊進環攻。幾有應接不暇之勢。曾國藩示以鎮靜。激勵諸軍。晝夜苦戰。相持數月之久。羣賊望風授馘。喪膽宵遁。自是軍威大振。而時局遂有轉機矣。迨安慶告克。沿江名城要隘。以次底定。而全浙復陷。吳越之民。接踵告急。曾國藩以賊勢浩大。定議分道進兵。其弟曾國荃統得勝之師。進薄金陵。攻守

並施鑿兵連歲楊岳斌彭玉麟專率水師掃蕩江面鮑超以霆軍東西馳擊外此則左宗棠援浙之師爲一路臣鴻章援蘇之師爲一路其淮潁一帶則有袁甲三李續宜多隆阿諸軍分途並峙將帥聯翩羽書絡繹曾國藩總持全局會商機宜折衷至當數年內軍情變幻奇險環生風波疊起其籌兵籌餉議剿議防憂勞情狀殆難縷述

朝廷復虛衷延訪凡天下大政及疆吏之能否無不殷殷垂問曾國藩知無不言言無不盡

聖明鑒其忠悃每有論奏立見施行用能庶政一新捷

音頻奏議者以爲戡定粵逆之功惟曾國藩實倡於始實總其成其沈毅之氣堅卓之力深遠之謀卽求之往古名臣亦所罕覩也方臣之初募淮勇也曾國藩授臣以手訂水陸營制一編臣披玩數四覺其所定人數之多寡薪糧之隆殺皆參酌時勢簡要精嚴允爲久遠不敝之規又酌撥湘勇數營俾獲觀摩練習臣抵滬之後擴充訓募實以此軍爲發軔之始迨金陵旣克累函囑臣勿撤淮勇以備剿捻之用同治四五年間曾國藩剿捻齊豫雖未見速效然長牆圍制之策實已得其要領臣得變通盡利以竟全功其創始之勞實不可沒臣於

七年七月曾經附片奏明初非推美之辭也致治之要莫先察吏曾國藩之在江南治軍治吏本自聯爲一氣自軍旅漸平百務創舉曾國藩集思廣益手定章程期可行之經久勸農課桑修文興教振窮戢暴獎廉去貪不數年間民氣大蘇而宦場浮滑之習亦爲之一變其在直隸未及兩年如清積訟減差徭籌荒政皆有實惠及民前後舉劾屬吏兩疏尤爲衆情所翕服其法於莅任之始令省中司道將所屬各員酌加考語開摺彙進以備校覈一面留心訪察偶有所聞卽登之記簿參伍錯綜而得其真俟賢否昭然具疏舉劾闔省驚以爲神

官民至今稱頌。曾國藩平生未嘗專講吏事。然其培養元氣。轉移積習。則專精吏治者所不逮也。兩淮鹺務。自兵燹以後。疲滯極矣。商本旣虧。引岸漸廢。加以營弁把持。票法全壞。曾國藩自駐安慶。卽將淮南北鹺綱次第整理。奏定新章。以運商運鹽到岸。弊在爭售。則立督銷總局。以整輪規。場商收鹽入垣。弊在搶跌。則立瓜州總棧。以保牌價。以商本宜輕。方利轉輸。則定緩釐以紓商力。以正課所入。絲毫爲重。則定奏報以務稽查。計自同治三年春初。至九年冬杪。共收課銀至二千萬兩以外。釐錢至七百萬串以外。近來湘淮各軍餉項。及解京之

項實以鹽利爲一大宗。而商民樂業。上下獲益。則其平日用意之公且溥。尤有在立法之外者矣。自泰西各國通商以來。中外情形。已大變於往古。曾國藩深知時勢之艱。審之又審。不肯孟浪將事。其大旨但務守定條約。示以誠信。使彼不能求逞於我。薄物細故。或所不校。曾國藩自謂不習洋務。前歲天津之事。論者於責望之餘。加以詆議。曾國藩亦深自引咎。不稍置辯。然其所持大綱。自不可易。居恆以隱患方長爲慮。謂自強之道。貴於銖積寸累。一步不可蹈空。一語不可矜張。其講求之要。有三。曰製器。曰學技。曰操兵。故於滬局之造輪船。方言

館之繙譯洋學未嘗不反覆致意其他如操練輪船演習洋隊挑選幼童出洋肄業無非求爲自強張本蓋其心兢兢於所謂綢繆未雨之謀未嘗一日忘也臣於曾國藩忠勳之蹟謹略舉其大端若此至其始終不變而持之有恆者則惟曰以克己爲體以進賢爲用二者足以盡之矣大凡克己之功未至則本原不立始爲學術之差繼爲事業之累其端甚微其效立見曾國藩自通籍後服官侍從卽與故大學士倭仁前侍郎吳廷棟故太常寺卿唐鑑故道員何桂珍講求儒先之書剖析義理宗旨極爲純正其清修亮節已震一時平時制行甚

嚴而不事表襮於外立心甚恕而不務求備於人故其道大而能容通而不迂無前人講學之流弊繼乃不輕立說專務躬行進德尤猛其在軍在官勤以率下則無間昕宵儉以奉身則不殊寒素久爲衆所共見其素所自勵而勸人者每遇一事尤以畏難取巧爲深戒雖禍患在前謗議在後亦毅然赴之而不顧與人共事論功則推以讓人任勞則引爲己責盛德所感始而部曲化之繼而同僚諒之終則各省從而慕效之所以轉移風氣者在此所以宏濟艱難者亦在此曾國藩秉性謙退受寵若驚從戎之始卽奏明丁憂期內雖稍立功績無

論何項褒榮概不敢受迨服闋之後戰功益著

寵命迭加其弟曾國荃累以戰功晉秩亦必具疏懇辭
至於再四其深衷尤欲遠避權勢隱防外重內輕之漸
故於節制四省節制三省之

命辭之尤力非矯飾也臨事則懼大功之難成終事則
懼盛名之難副故位望愈重而益存欲然不足之思前
歲回任兩江

朝廷許以坐鎮聞曾國藩仍力疾視事不肯少休臨歿
之日依舊接見屬僚料檢公牘其數十年來逐日行事
均有日記二月初四日絕筆猶殷殷焉以曠官爲疚戰

競臨履之意溢於言表。此其克己之功。老而彌篤。雖古
聖賢自強不息之學。亦無以過之也。自昔多事之秋。無
不以賢才之眾寡。判功效之廣狹。曾國藩知人之鑒。超
軼古今。或邂逅於風塵之中。一見以爲偉器。或物色於
形迹之表。確然許爲異材。平日持議。常謂天下至大事
變至殷。決非一手一足之所能維持。故其振拔幽滯。宏
獎人傑。尤屬不遺餘力。嘗聞江忠源未達時。以公車入
都。謁見。款語移時。曾國藩目送之曰。此人必立名天下。
然當以節烈稱。後乃專疏保薦。以應求賢之
詔。胡林翼以臬司統兵。隸曾國藩部下。卽奏稱其才勝

已十倍。二人皆不次擢用。卓著忠勤。曾國藩經營軍事。卒賴其助。其在籍辦團之始。若塔齊布。羅澤南。李續賓。李續宜。王鑫。楊岳斌。彭玉麐。或聘自諸生。或拔自隴畝。或招自營伍。均以至誠相與。俾獲各盡所長。內而幕僚。外而臺局。均極一時之選。其餘部下將士。或立功既久而浸至大顯。或以血戰成名。臨敵死綏者。尤未易以悉數。最後遣劉松山一軍入關。經曾國藩拔之列將之中。謂可獨當一面。卒能揚威秦隴。功勳卓然。曾國藩又謂人才以培養而出。器識以歷練而成。故其取人。凡於兵事餉事吏事文事有一長者。無不優加獎借。量材錄用。

將吏來謁無不立時接見殷勤訓誨或有難辦之事難言之隱鮮不博訪周知代爲籌畫別後則馳書告誡有師弟督課之風有父兄期望之意非常之士與自好之徒皆樂爲之用雖其桀驁貪詐若李世忠陳國瑞之流苟有一節可用必給以函牘殷勤諷勉獎其長而指其過勸令痛改前非不肯遽爾棄絕此又其憐才之盛意與造就之微權相因而出者也竊嘗綜敘曾國藩之爲人其臨事謹慎動應繩墨而成敗利鈍有所不計似漢臣諸葛亮然遭遇

盛時建樹宏濶則又過之其發謀決策應物度務下筆

千言窮盡事理。似唐臣陸贄。然涉歷諸艱。親嘗甘苦。則
又過之。其無學不窺。默究精要。而踐履篤實。始終一誠。
似宋臣司馬光。然百戰勲勞。飽閱世變。則又過之。臣於
曾國藩師事近三十年。既確有聞見。固不敢阿好溢美。
亦何忍令其苦心孤詣。湮沒不彰。反覆籌思。義難終嘿。
謹撮敘大略。據實瀆陳。相應請
旨飭付國史館查照施行。以彰

先帝知人之明。而示後世人臣之法。所有督臣忠勲卓
越。始終盡瘁情形。恭摺由驛馳陳。伏乞

皇太后

皇上聖鑒訓示謹

奏

伯相初聞文正公之喪亟欲具疏臚陳事蹟請付史館惟以相隔較遠於近事未能周知乃馳書金陵幕府屬福成與錢子密京卿就近攷覈福成遂草此疏寄呈輾轉稽延倏逾兩月時則署兩江總督何公湖廣總督李公安徽巡撫英公皆已陸續具疏表章朝廷恩禮優渥至再至三伯相以謂若再陳奏近於煩瀆因寢不上然其後每與幕僚談及頗惜當時未用此橐又謂此等大文其光氣終自不磨滅也

自識

李眉生云此篇翔實扼要在吳楚兩疏之上

楊利叔云傳千古大人物須有大學識方能窺見其精微須有大手筆方能包舉其體用是時吳楚兩疏吳疏出李眉生廉訪之手楚疏出李次青方伯之手二李皆文正公門人必能窺見底蘊然余讀此作透切完密始覺毫無遺憾

代李伯相覆陳疊奉

寄諭分別籌議疏

已卯

奏爲疊奉

寄諭分別籌議恭摺密陳仰祈

聖鑒事竊臣欽奉光緒五年六月初七日

上諭都察院奏代遞貴州候補道羅應旒敬呈管見一摺所陳整學校以新吏治練兵民之武技以自強精機汽之器械以利用參西國之法例以謀遠握朝野之利權以儲費各條有無可采著李鴻章沈葆楨體察情形悉心妥籌具奏等因又奉九月三十日

密諭翰林院侍讀王先謙條陳洋務事宜一摺所奏審

敵情振士氣籌經費備船械各節不無可采著李鴻章
沈葆楨卽將海防事宜並該侍讀所陳備船械一條切
實籌議先行具奏王先謙所稱任將擇使二事亦爲儲
才起見李鴻章等如有所知著隨時密行陳奏以備錄
用此外各條是否可行並著分別妥議具奏等因又奉
十月二十四日

密諭丁日昌遵議覆奏各摺不無可采現議整頓輪船
水師自非擇將帥精器械不可西人熟習輪船操練應
如何設法訪訂之處著李鴻章沈葆楨與出使各國大
臣函商辦理至學堂練船出洋諸舉皆爲豫儲將才之

計尤當擴充精選以備異日之用丁日昌片內所奏各節除減額兵停武科二事均無庸議外所稱擴充礦務裁撤水師及凡非極要處所祇須防以水雷暫可停造礮臺並裁汰腹地勇營著李鴻章沈葆楨妥議具奏至所奏稍寬釐稅以杜洋票一節於餉項有無裨益著一併籌議具奏等因欽此並先後鈔錄原摺給閱前來仰見

聖主虛衷聽納博訪周諮曷勝欽服臣於十月二十七日業將海防購船選將各節切實籌議密摺覆陳此與丁日昌之所謂擇將帥精器械王先謙之所謂振士氣

備船械大致尙不甚歧異現可無庸贅論伏思近來時事多艱

朝廷深思遠慮廣開言路內外臣工得以抒其蘊蓄暢所欲言嘉謨異策原可輻湊並進惟是言者之精粗深淺既有不同卽所言甚當或礙於成例或阻於浮言或絀於經費或乏於人才往往難見諸施行而凡一事之利弊又非確有見聞難遽懸斷其事之關涉他省者尤非南北洋大臣權力所能及耳目所能周往返行查迹近推宕茲臣謹將確鑿可行者籌定一二其於事理稍疎輿格於時勢暫宜緩行者不復置議以附實事求是

之義卽如礦務一節丁日昌王先謙羅應旒皆言之今直隸之開平湖北之當陽安徽之貴池臺灣之雞籠均已試辦冀有數處稍著成效卽可逐漸擴充洋藥酌加釐稅與機器製造輪船招商各節王先謙羅應旒皆言之除洋藥釐稅並徵應由總理衙門與英使威妥瑪商辦外其織造機器已創辦於蘭州輪船攬載已設局於津滬各埠招商借款目下辦法原不出此若辦理日有起色商情自更踴躍官本亦較易籌要之此數端者仰賴

朝廷主持於上臣等乃得審度機宜妥爲經營旣須臨

事變通尚難豫設成法。又望各省大吏意見相同。呼應無甚隔閡。各處輿情。歷練既久。賢才因之奮興。則風氣漸開。富強之基可立矣。至羅應旒之條議。如兼課西學。以資實用。鼓勵巧工。以新製造。獎勸巨商。以握利權。均可節取而酌行之。將來遇有此等事件。應由臣等隨時請

旨核辦。王先謙之條議。以日本吞併琉球。藐視中國。意在整軍經武。大張撻伐。譬彼強鄰。斯事關係較重。必深籌乎彼此進退之機宜。熟審乎本末輕重之分數。日本國小財匱。其勢原遜於泰西諸邦。惟該國近來取法西

人於練兵製器各務刻意講求頗有振興氣象中國水師尙未齊備餉需亦未充足若彼不再肆鴟張似仍以按約理論爲穩著但倭人性情桀驁設令狡焉思逞亦不可無以待之中國自強之圖誠難一日稍緩矣他如墾闢荒田嚴汰冗員整頓釐權皆各省應辦之政擇使一事亦係要務俟有所知隨時密陳以備錄用丁日昌之條議洞晰中外情勢多閱歷有得之言與空談無實者不同所議購船及延西人教練一節山東浙江及閩粵各省均須暫備蚊船前奉

旨飭臣代爲經理俟各該省籌款解到或仍交赫德承

辦以資熟手。若購辦鐵甲船。經費果能湊齊。應函商出使大臣李鳳苞等。設法訪購。其續延教練西人。亦請曾紀澤李鳳苞等。就近物色。必須專門名家。才能出衆。而又恪聽調度者。始敢決計延訂。赫德如有所知。苟係上品。亦可招用。但中西教法不同。上等人材。肯來中國者。頗少。祇能懸其格。尙難遽得其人也。海口非極要處所。防以水雷。即可停造礮臺。旣節糜費。又示敵以不測。固爲合算。惟水雷事理。頗奧。各省眞能講求者。頗少。釐稅宜稍崇寬大。以廣招徠。是在多選廉平之員。專司樞務。必於餉項有裨。至腹地勇營。及沿海紅單艇船之類。原

可酌量裁撤。惟各省地勢遼濶，伏莽尙多，非有得力防營，不足以資控制。艇船弁兵額餉較輪船勇餉爲儉，間能捕盜於淺水之處，以輔輪船所不逮，恐亦未可盡裁。應請

敕下各省督撫參酌時宜，認真淘汰。凡艇船之窳敗無用者，勇營之虛弱不得力者，量加裁撤。旣昭覈實，又不至偏廢矣。抑臣更有請者：邇來各國環伺，外侮交加，未雨綢繆，正在今日。閱丁日昌之議，令人憂危之意，悚然而生。倘蒙

聖主堅持定見，激勵人才，勿爲浮議所搖，勿爲常例所

格內外臣工同心戮力以圖自治自強之要則敵國外患未必非中國振興之資是在一轉移間而已所有疊奉

寄諭分別籌議緣由恭摺由驛密陳伏乞

皇太后

皇上聖鑒訓示謹

奏

代李伯相籌議海防事宜疏

庚辰

奏爲海防要圖分別緩急遵

旨妥籌恭摺密陳仰祈

聖鑒事竊臣承准軍機大臣密寄十一月初二日奉

上諭梅啟照奏請整頓水師擬定各條開單呈覽一摺
所稱請飭船政局及江南機器局仿造鐵甲船預籌購
買外洋鐵甲船及槍礮等件推廣招商局船赴東西洋
各國貿易添設海運總督設立外海水師提督裁改海
疆各種笨船嚴防東洋練習水戰長江水師添撥中號
輪船各節係爲自強起見著李鴻章劉坤一按照摺內

所陳悉心籌商妥議具奏原摺單著鈔給閱看等因欽此仰見

聖主整飭海防虛衷博訪至意曷勝欽服從來禦外之道必能戰而後能守能守而後能和無論用剛用柔要當豫修武備確有可以自立之基然後以戰則勝以守則固以和則久自泰西各國競起爭雄陸兵以德國爲最精水師以英國爲最盛至其船堅礮利則無論國之大小莫不精益求精蓋外洋以戰立國分爭互峙實有不能不尚武之勢萃千萬人之心思才力以治戰艦槍礮遂月異而歲不同日本雖蕞爾彈丸近亦思學步西

人陵侮中國。夫以中國風氣較遲。地廣民衆。爲各國所環伺。即使俄與日本暫弭鬭端。而濱海萬餘里。必宜練得力水師。爲建威銷萌之策。揆之事勢。固難再緩。梅啟照所謂講求船礮。誠思患豫防。綢繆未雨之至計也。查原奏單內第一第二條。請令船政大臣及江南機器局仿造鐵甲船。從前閩滬輪船多係舊式。以之與西洋兵船角勝。尙難得力。閩廠後來所造揚武等數船。則漸漸合用矣。然欲仿造鐵甲船。尙恐機器未全。工匠未備。不若西洋購材製料。取攜較便。廠肆旣多。可以任意選擇。惟是中國製造之法。宜漸擴充。果使所造行駛之速。鋒

稜之利不遜於洋廠雖需費稍多亦可免洋人之居奇
開華匠之風氣擬請

敕下船政大臣詳查該廠仿造鐵甲究須添備機器若
干船長廣及喫水若干丈尺鐵甲厚若干仿照何項新
式每點鐘能行若干里約須造價若干詳細酌估具覆
如能合算卽以應購鐵甲之費附入該廠剋期造辦至
滬局製造槍礮彈藥各項工器太繁經費支絀已飭停
造輪船同治十三年試造小鐵甲船不能出海礮位布
置亦不合法雖該局機器略備而無精熟此道之員匠
於西洋新式隔閼尙多似可緩議也第三條請俟俄事

定妥仍速購鐵甲船臣前奏明南洋與臺灣購鐵甲船二號北洋購鐵甲船二號合共四號斷難再少現據李鳳苞電報已在德國船廠訂造鋼面鐵甲一隻彙集各國新式核開價目船礮兩宗約需規平銀一百四十萬兩而添購魚雷電燈及回國運費尙不在內蓋旣購利器須擇其最新之式樣李鳳苞親歷英德各廠再三悉心考校始行定議自必確有所見惟臣初次請撥兩船之款僅得福建六十萬兩出使經費兩次借撥六十萬兩部餉三十萬兩本多短絀今需價稍昂計兩船不敷已一百數十萬兩至續請兩船所指淮南鹽捐及招商

局官款即使如數撥濟尙短百萬焦灼莫名臣已函告李鳳苞商令此後定船如能較前價稍減或此間籌足款項方可續訂第已定之一隻除先滙英銀二十萬磅合銀七十七萬五千餘兩外將來分期續滙只有儘借撥出使經費及部餉三十萬酌量勻湊若續訂一隻所短百萬以外應請

敕下總理衙門戶部迅爲籌撥的款以濟要需至南北洋經費短解日多臣於三月六月間兩次奏催請比照京餉章程預定延欠處分經戶部議覆奉

旨俞允在案惟尙無分別藩司督撫明文各省報解仍

不及八成之數。今梅啟照擬請將藩司照貽誤京餉例議處。督撫於藩司處分上減一等議處。實與前次部議相符。且邊防海防無分軒輊。陝甘既比例京餉。則海防豈可歧視。擬請

旨敕下該衙門申明舊例行知各省。自此次定章以後。倘再有拖欠遲逾。均卽照例議處。惟原撥經費四百萬兩。除去福建廣東截留之款。卽使解足八成。台南北洋不過得二百萬餘兩。每處僅得百餘萬。目前添購後膛槍礮及水雷電線等項。需用繁巨。以後船隻到齊。歲費實苦不支。是欲購大宗船械。非隨時另籌不可。鐵甲船

尤非另籌不可也。第四條請推廣招商局船赴東西洋各國。夫欲自強必先裕餉。欲濬餉源莫如振興商務。商船能往外洋。俾外洋損一分之利。卽中國益一分之利。微臣創設招商局之初意。本是如此。近來該局和衆美富兩船已往舊金山檀香山等埠。明春擬派海琛船運載兵弁赴英。驗收碰快船回華。均足爲商船出洋之先導。然此事須逐漸擴充。非倉卒所能收效。至日本自設輪船公司。關稅獨減。中國商輪前往。權稅加重。故局船因虧耗而停行。所請酌派豐順保大試行東洋之處。應暫緩議。第五條請添設海運總督查運河爲黃水梗阻。

每歲止能運十萬石。而百萬石斷不能運。誠如梅啟照所言。然往時河運費多弊重。以有倉場。有漕督。上下各衙門。層層鈐制也。今海運百萬石。招商局與沙船甯船分運。毫無貽誤。經費較省。流弊尙少。若於煙臺添設總督。多一衙署。卽多一重胥吏丁役需索之繁。恐經費漸難撙節。弊端仍難淨除。如慮海上有事。固非空設一大員所能爲力。如令其節制沿海水師。則既有南北洋大臣。及各省督撫。又有添設外海水師提督。又設漕督。未免號令紛歧。事權不壹。應請無庸置議。第六條請將海疆各種笨船一律裁改。臣於同治十一年五月十三年

十一月兩次奏請將各省紅單拖罟艇船舢板等項分別裁併抵養輪船前福建撫臣丁日昌亦嘗奏稱裁併五十號艇船可養給一號大兵輪船裁併十號濶頭舢板可養給一號根鉢輪船臣於去年十一月議覆丁日昌條陳摺內奏稱艇船兵餉較儉間能捕盜於淺水之處以輔輪船所不逮雖未可盡裁請擇其廢敗無用者量加裁撤今梅啟照請將各種笨船除多槳可以逆風者暫留少半餘皆裁改與臣等前議大致相同意在騰出餉項化無用爲有用實爲救時要政擬請

敕下沿海各省督撫悉心酌度力任怨謗認真辦理第

七條請嚴防東洋。查日本國小民貧。虛憍喜事。長崎距中國口岸。不過三四日程。揆諸遠交近攻之義。日本狡焉思逞。更甚於西洋諸國。今日所以謀創水師。不遺餘力者。大半爲制馭日本起見。至朝鮮爲東三省屏蔽。關係尤鉅。臣前勸其與西人立約。并導以練兵購器。無非望其轉弱爲強。他日如該國有警。或須派兵應援。或別有救急之方。固當惟力是視也。第八條請設立外海水師提督。從前丁日昌有設立北洋中洋南洋水師提督之議。與前督臣曾國藩所陳沿海七省沿江三省歸併設防之說。大旨略同。北洋俟鐵甲二船購到。海上可自

成一軍。擬請添設水師提督額缺。其體制應照長江水師提督之例。節制北洋沿海各鎮。按期巡洋會哨。以專責成。南洋船隻亦尙未齊。或如梅啟照所議。暫將統領輪船之松江提督改爲蘇浙外海水師提督。節制蘇浙沿海各鎮。擬請

敕下南洋大臣察酌情形。隨宜妥辦。惟閩粵臺灣與松滬相去遼遠。勢難兼顧。且福建統領輪船之提督彭楚漢與松江提督李朝斌。望均勢敵。難相統攝。似應與廣東聯爲一氣耳。第九條請令海疆提鎮練習水戰。大致卽是設立外海水師之說。梅啟照謂水能兼陸。陸不能

兼水敵船可以到處窺伺。我挫則彼乘勢直前。彼敗則我望洋而歎。洵係確論。夫水師所以不能不設者。以其化呆著爲活著也。今募陸勇萬人。歲餉約需百萬兩。然僅能專顧一路耳。若北洋水師成軍。核計歲餉。亦不過百餘萬兩。如用以扼守旅順。煙臺海面較狹之處。島嶼深隱之間。出沒不測。卽不遽與敵船交仗。彼慮我斷其接濟。截其歸路。未必無徘徊瞻顧之心。是此項水師果能以全力經營。將來可漸拓遠島爲藩籬。化門戶爲堂奧。北洋三省皆在扞衛之中。其布勢之遠。奚啻十倍陸軍。卽此以觀。而南洋之利用水師。亦可想見。然所以議

之數年尙無成者以無大宗經費購辦鐵甲船快船也。竊查定制各省綠營兵數六十餘萬歲餉約二千萬兩。邇者直隸河南兩江閩浙湖北等省皆加餉練兵其餘歲發兵餉自五六成至七八成不等然自剿辦粵捻回各逆專倚勇營迨內地肅清各省復不能不酌留防勇以資彈壓而綠營則竟無可調用其兵精則姑循守舊章是多一倍餉額也自海上防務興而築礮臺造戰艦購槍礮練海軍厥費甚鉅原所以代綠營勇營之用而綠營勇營仍未少減是又多一倍餉額也中國財用本不甚裕而有此三倍之餉額所以愈形支絀今海上如

有水軍一枝勝於陸勇數萬人。陸勇一枝勝於綠營數萬人。值此多事之秋。勇營分防要地。尙難裁減。如欲實事求是。整軍經武。惟有稍汰綠營。積存餉項。以爲購造船械。創立海軍之經費。擬請

敕下各疆臣查明該省綠營兵現存實數。除加餉練兵。省分及邊要各鎮。或難驟減。其餘酌度形勢。通減二三成。汰減之法。凡老病死亡斥革之卒。皆空其額。不復挑補。沿海營兵。可挑入水師者。亦如之。每歲疆吏核明所減兵數。與所節餉數。咨報戶兵二部。戶部卽提出此款。撥歸南北洋。爲籌辦海軍之用。如此數年後。或有成數。

可稽。夫今之議者，頗謂勇營亦有流弊，不如綠營經制之兵。若汰經制之綠營，而立經制之海軍，一轉移間，可收實用。且所減僅二三成，而又出之以漸，措辦尙無窒礙。裕餉強兵之道，舍此似無他術也。第十條請長江水師添撥中號輪船。查前侍郎臣彭玉麟奏請添造十七八丈之中號輪船十隻，爲江陰以下海防之用，奉

旨敕下兩江、福建、廣東各省籌辦。果使款項應手，剋期趕造，則江防聲勢較盛，惟需費已近百萬。現在閩、滬、粵三廠餉項皆形竭蹶，能否認定分辨，尙難懸揣。梅啟照擬撥長江提督輪船二隻，沿江五鎮每鎮一隻，計共七

隻已稍減於彭玉麟所請之數。與其無款而中輟。不如少造而有成。似宜俟閩粵各廠參酌會商。量力分造。必令仿兵船之式。而不必豫定船數。亦防務之一助也。以上梅啟照所陳十條。或亟宜興辦。或暫可緩行。或稍俟變通。至梅啟照議創水師。注意於鐵甲船。所稱遴選武員。有智謀而小心者。文員有膽略而耐勞者。爲之統將。自係識時之論。或謂敵本用此。中國卽有數號鐵甲。豈能制勝。不知西洋各國。去中國數萬里。其大鐵甲來者。不過數號。其餘均係快船兵船之類。中國亦須逐漸添製。但得利器與之相敵。加以客主勢逸之勢。我自可操。

勝算至日本地陬財匱近雖倔强東海之中其力量亦
斷不能多購真鐵甲也所有梅啟照條陳各件謹分別
緩急遵

旨妥籌恭摺由驛密陳是否有當伏乞

皇太后

皇上聖鑒訓示謹

奏